

TE HEHEURAA API

NENEIHIA I ROTO I TE PIHA NENEIRAA A TE EKALLESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 1

Tenuare 1936.

Mat. 30.

*Eiaha roa ei mea e ravehia ma te mârô e te teoteo faufaa ore
ra; ei aa haehaa râ, i te mana'o haamaitairaa'tu te tahi i te
tahi eiaha ia'na iho. Eiaha hoi te taata atoa e haapao i ta'-
na ana'e ihora, e haapao atoa râ i ta vetahi ê ra maitai.
Philipi 2:3-4.*

Te Matahiti Apî

IA ora na te taata atoa i raro a'e i te Tamaru o te Hau FA-
RANI, i Oteania nei, i roto i teie Matahiti Apî 1936.

Ia tae mai te tau no te Matahiti Apî te horo nei te ma-
na'o o te Heheuraa Apî i to'na ra mau hoa, i te mau fenua
moana nei, e te parau atu nei oia e, *Ia ora na outou i te aro-
ha o te Fatu, e ia maitai e ia manuia ta outou mau ohipa pa-
rau tia i roto i teie matahiti Apî 1936.*

O teie te hoê tau e au ia tatou ia parahi i raro e ia faa-
tia i to tatou mau mana'o ia faaho'i atu ia tatou na te e'a i
haerehia e tatou i teie matahiti tahito tei mairi a'enei, e ia

haere tatou na taua e'a ra, a hi'opoa maitai tatou i te huru o to tatou haereraa, ma te uiui papu ia tatou iho e, eaha te ohipa maitai ta'u i rave i te matahiti tei mairi i muri; Ua oaoa hoi anei e ua maitai anei te hoê mau taata i te ohipa ta'u i rave? Ua tauturu anei au i tei roohia i te ati e te pea-pea, ua aroha anei vau i to'u taeae ma te parau atu i te mau parau faaino ore i nia ia'na; ua haamana'o anei au i to'u Metua i te Ra'i, te tumu no to'u mau haamaitairaa atoa, na roto i te raveraa i ta'na ohipa e te haapaoraa i ta'na mau faaueraa? Mai te mea etia ia tatou ia pahono E, i teie mau uiraa i nia nei, e tia ia ia tatou ia parau e, ua maitai e ua manuia ta tatou ohipa i roto i te matahiti tei mairi i muri.

E mea poto to tatou oraraa i nia i te fenua nei, e eita e rahi te Matahiti Apî ta tatou e ite, e ua ite tatou e, e faautuahia te taata mai te au i te ohipa ta'na i rave; e faahotu mai te ohipa maitai i te aroha, te here, te oaoa e te mau mea maitatai atoa, e na te ohipa ino e faahotu mai i te mauui, te pea-pea e te mau ati ua ran te huru.

No reira, i roto i teie Matahiti Apî, a tamata tatou *Ia anaana ia i mua i te aro o te taata nei, ia hi'o ratou i ta outou parau maitai, e ia haamaitai i to outou Metua i te ao ra. Mataio 5:16.*

Te Meheuraa Apî.

E tena na, e haamana'o i tei Hamani ia oe i to apîraa ra, aita i tae i te mau mahana ino ra, e aita i tae i te mau matahiti e parau ai oe ra, Aita roa o'u e maitairaa. Koheleta 12:1.

Te Menema I Nia I Te Aivi Ra O Cumora.

TE Tii tei faahanahanahia i te 21 no Tiurai 1935 i nia i te aivi ra Cumora o te hoê ia tei hau i te nehenehe i rotopu i te mau Tii no te fenua Amerika. Te vai nei taua aivi ra o Cumora i te mataeinaa ra o Ontario, i te hitia o te râ o te tufaa fenua New-York. Ua avarihia te reira e Hebera GARANATA te Peretiteni no te Ekalesia a Iesu Mesia i te Feia Mo'a i te Mau Mahana Hopea Nei, e e haamana'o-raa te reira Tii no te iteraahia te Buka a Moromona na roto i terraveraa o Moroni, te hoê melahi tei faauehia e te Atua no taua ohipa ra.

Ua ite tatou i te parau tuatapapa no te Buka a Moromona e te ravea maere mau tei ravehia no to'na iritiraahia ei reo baratane. E parau maere mau e te faahiahia hoi e no te rahi o to'na faahiahia aita oia i fariihia e teie nei ao faaroo ore; eita ra te tia, e a ore ra te haavare o te hoê mea e faitohia na nia i to'na fariiraahia, e a ore ra te patoiraahia e te taata nei. I te matamua ua patoi te taata i te haapiiraa a Kepler no nia i teie nei ao e ta Colombus i nia i te menemeneraa o te fenua nei, noa'tu e e parau mau ta raua i haapii. Ua parau te tahi mau taata paari, ma te rave i te Bibilia ei tauturu, e hara rahi roa ia parau e, e mea menemene te fenua nei, e no reira ua haapourihia e ua faaateahia te taata i te parau mau.

Hoê â ia i te tau no Iosepha Semita, ua haapii te tahi mau Orometua, no te tahi mau haapaoraa e, ua î roa te heheuraa e eita roa e tia ia amuihia te hoê parau i te mau parau papai e ua opanihia te tau no te heheuraa a te Atua i te taata nei i nia i te fenua. Ua faaorehia te heheuraa e te mau

orama i to Iesu haereraa mai e i te tau no te mau Aposetolo, e i taua vahi ra ua hape â te mana'o o te taata e ua faaatea â ratou ia ratou iho i te parau mau, no reira ratou i patoi ai i te mau parau maere no te iteraahia o te Buka a Moromona. Area ra e parau mau taua parau ra e ia ore oia e fariihia, o te taata tei ore i farii te faahapahia, o te huru ia no te parau tia o te Atua, no te mea na taua buka ra e horoa mai i te ravea i te taata te titau ia ite oia e, e parau mau anei, e a ore ra e haavare anei.

No te aha matou i parau ai e, o te menema i Cumora tei hau i te nehenehe i te mau menema atoa tei faatiahia i nia i te fenua Amerika? No te mea e haamana'oraa ia no te iri-tiraahia ei reo baratane no taua buka faahiahia ra tei tae mai i roto i te rima o te taata nei ua roto i te mau ravea maere. Noa'tu i te vahi atea ta matou e hio nei, te faaite hua'tu nei matou e, aita a'enei te hoê buka i itehia, iritihia e i neneihia mai teie nei buka, e na te reira e faariro i te Buka Moromona ei buka taa ê roa i te tahi mau buka atoa ra. E taua mau mea maere ra! e tia ia parau: e haavare anei, e parau mau anei. Mai te mea e haavare ua riro ia taua tii ra ei faaite i te faufaa ore o te faaroo o te Momoni; mai te mea e parau mau te reira mau mea, aita ia e faito no to'na auraa e to'na tia.

Ua riro teie nei Tii ei ravea faahiahia na te Ekalesia no te haaparareraa i ta'na mau haapiiraa. Mai te hoê tia, ua faatiahia oia i nia i taua aivi ra mai te hoê ite te ani i te ao nei ia hi'opoa i te parau no te Buka a Moromona. Te faaite nei oia i te tiaturi papuraa o te Ekalesia i roto i te tia o taua buka ra e te faaite atoa nei oia e, te hinaaro mau nei te Ekalesia ia haapapu maitaihia te tia o taua buka ra. Na teie uiraa e ume mai i te mau feruriraa i roto i te mau matahiti e haere mai nei. Noa'tu i to'na haehaa e hau roa teie ravea

na
apî
por
mai
ka
lit
mo
raa

N.

su
ta
tuu
ora
ta
ia

te
mai
Iose
mat

na rapae atu i te vahi i faaaubhia no'na ra e o te hoê ia ravea apî mau ta te Ekalesia i rave no te faaiteraa i ta'na parau poro i te taata. Eita anei oia e riro ei ravea te hau roa i te maitai? E ere anei, e riro mau te Buka a Moromona ei buka te hau roa i te tai'ohia e te haapararehia i teie mau tau? Eita roa e tia i te taata te poro i te parau no te faaroo Momoni ia ore oia ia rave i taua buka faahiahia no te tauturu-raa ia'na i roto i ta'na ohipa.

Papaihia e Iosepha F. Merrill.

E PURERAA TOMORAA E TE HAAMAITAIRAA NA TE PERETITENI RA O HEBERA GARANATA

I TE TOMORAAHIA TE MENEMA I NIA I TE AIVI RA O CUMORAH.

E TE Atua, to matou Metua here i te ao ra, tei haamani i te ra'i e te fenua nei, te Metua tane o Iesu Mesia te Taraehara o te ao nei e te Faaora o te mau taata atoa, te haamaitai nei matou ia Oe o Oe i ite ua tia roa ia tuu faahouhia mai, i nia i te fenua nei, te ravea e noaa'i te ora i te mau taata atoa na roto i te haapaoraa i te mau ture ta Oe i heheu mai e ia ho'i faahou ratou i mua i to Oe aro e ia parahi ratou ia Oe ra e a muri noa'tu.

E to matou Metua e, te haamaitai nei matou ia Oe mai te hopea o to matou mafatu, o Oe i ite e mea tia ia heheu mai Oe ia oe iho e to Tamaiti o Iesu Mesia, i te tamaiti ra o Iosepha Semita, te haamaitai nei matouia Oe no te mea aita to matou e feaa no nia i to Oe huru mau, e na roto i ta Oe mau

ohipa e to Oe iho fâraa mai e ta Oe iho Tamaiti atoa hoi, te faaite nei Oe e, ua hamanihia te taata nei mai te au i te ho-hoa no tei hamani ia'na.

Te haamaitai nei matou ia Oe, e to matou Metua here i te ao ra, o Oe i faatia i to peropheta ra, ia Moroni, ia farerei i te tamaiti ra o Iosepha Semita, e no to Oe faatiaraa ia'na, no na matahiti roaroa e maha, ia farerei i te peropheta i nia i teie aivi e te haapiiraa'tu ia'na i te mau parau tumu no te Evanelia e te faaineineraa ia'na no te tiaraa ei upoo no ta oe Ekalesia, tei faatia faahou hia i nia i te fenua nei, oia hoi, te Ekalesia a to Oe Tamaiti o Iesu Mesia.

E to matou Metua ua manruuru matou no te horoaraahia ia'na te mau apĭ auro e ua faauruhia oia e Oe, na roto i te Urima e te Tumima tei tuuhia i roto i to'na rima, no te iritiraa i te parau mo'a tei papaihia i roto i te Buka a Moromona.

Te mauruuru nei matou, e to matou Metua i te ao ra, o Oe i hi'o e, ua tia ia Oe i te faaite papuraa i te mo'araa o te ohipa ta matou e rave nei, a tere noa'i te mau matahiti. Te haamaitai nei matou ia Oe, to matou Metua, i te mea e ua faufaa ore te pariraa e, e haavare te Buka a Moromona no te mea aita roa i itehia te hamaniraa fare cima i nia i teie nei fenua. Te mauruuru nei matou no te mea ua iteahia te reira mau fare, e te tahi mau puea, no te mea i raro a'e i te tahi mau puea tei fatata i te oire ra o Mexico ua iteahia te tahi mau fare cima nehenehe roa.

Te mauruuru nei matou no te radio, no te mea na te reira e faaore i te vahavaharaa hia te parau i roto i te Buka a Moromona tei faaite e, ua faarookia te reo o Iesu na te fenua atoa. Ua vahavahahia taua parau ra, no te mea ua mana'ohia e, eita te reo o te taata e tae atu i na hanere avae i te atea, area ra i teie nei, na roto i te radio e faarookia te reo o te taata na te ao atoa nei.

Te oaoa nei matou no te mea ua faaorehia te parau faa-ino tei tuuhia i nia i te tufaa no te Buka a Moromona tei faa-ite e, e puaahorofenua to nia i taua fenua ra. Ua mana'ohia e haavare taua parau ra, no te mea, i to Christopho Colombus taeraa i taua fenua ra aita i iteahia te hoê puaahorofenua, area ra, ua noaa mai te ivi o te puaahorofenua e to te tahi atu â mau animala i roto i te mau apoo ora mori arahu i Tarafonia.

Te mauruuru nei matou i te hanereraa e te tauatiniraa o te mau faaiteraa tei horoahia i te taata, oia hoi te mau millioniraa o te mau faaiteraa no nia i te mo'araa o te Buka a Moromona.

Ua mauruuru matou, e to matou Metua, o Oe i faatia ia Ioane Bapetizo, tei mau i te Autahu'araa a Aarona, te mana ia bapetizo i te Faaora, ia fâ mai ia Iosepha Semita raua o Olive Taudere e te horoa ia raua taua Autahu'araa ra e taua mana ra. Te oaoa nei to matou mafatu i te mea ua ho'i mai te mau Aposetolo a Iesu Mesia, o Petero, Iakobo e Ioane, i nia i te fenua nei, e ua tuu i to ratou mau rima i nia i te upoo o te Peropheta ra o Iosepha Semita raua o Olive Taudere e ua faatia faahou i te Autahu'araa a Melehizedeka, e te Aposetolo raa tei ore i vai i nia i te fenua nei.

Te pure haehaa'tu nei matou ia Oe, o matou tei farii i te oro'a no te bapetizoraa, o matou tei faatoroahia i te Autahu'araa Teitei, e o ratou atoa tei farii i te faaiteraa no te mo'araa o te ohipa tei faatiahia— te pure haehaa'tu nei matou ia tauturu mai Oe ia ora matou e ia riro to matou mau oraraa ei faaite no te mo'araa o te ohipa ta matou e rave nei.

Te mauruuru nei matou no te huru faaterereraa o ta Oe Ekalesia e to'na tupuraa maere mau. Aita e faito no to matou mauruuru i te mea e, noa'tu te mau patoiraa e te mau parau haavare tei tuuhia'tu no roto mai i te tufaa fenua New York, e te mau hamani ino raa i te mau taata tei faahoro ia ratou i Ohio, ua haamaitahia to Oe mau taata e ua rahi noa te mau melo i roto i te Ekalesia.

Te mauruurn nei matou i te mea e, noa'tu te rahi o te patoiraa i roto i Ohio e tae noa'tu ua haere te mau taata i Missouri, ua taa noa ia Oe e, e mea tia ia manuia te mau taata e ua faatiaia Oe i te mafatu o te mau taata e ua farii ratou i te Evanelia noa'tu te mau hamani ino raa.

Te mauruuru nei matou e aita hoi e faito e au no te reira i te mea e, noa'tu te faaueraa haamou a te tavana no te tufaa fenua Missouri, e noa'tu e ua faauehia ia pupuhia o Iosepha Semita e te tahi mau taeae ia poipoi a'e, ua paruru Oe i to ratou mau oraraa, e te heheuraa tei hau i te mau heheuraa atoa tei fariiha e te Oe mau taata, ua horoahia te reira i te Peropheta ra o Iosepha Semita, i roto i te fare tapearaa i Liberty, i muri rii noa iho i to'na faautuaraahia i te utua pohe. Te pure nei matou e, ia tai'o noa'tu matou i taua heheuraa maere e te faahiaha, ia horoahia mai ia matou te ururaa o te Atua ora ia tia ia haapao matou i te mau faaueraa a te Fatu.

Te mauruuru nei matou, e te Metua, i te mea e, noa'tu o te tiahiraahia o to Oe mau taata i rapae i Missouri, ua haamaitai e ua haamanuia Oe ia ratou e ua patu ratou i te hoê Hiero nehenehe roa i Navu. E ua patuhia te hoê oire rahi i tana vahi ra, o te hoê tei hau atu i te manuia, oia hoi, te oire rahi a'e, a hape atu ai au ra, no te tufaa fenua Ilinoi.

Na roto ra i te feii, te inoino e te mau haavare o te mau taata, ua tiahi faahou hia te Feia Mo'a e ua haere ratou e 1500 maile na roto i te medebara e tae noa'tu i te faa o te Roto Miti. Te mauruuru nei matou i te mea e ua paruruhia te mau taata e te mauruuru nei matou no te mea ua tupu te hoê tohuraa tei tohuhia, hou rii a'e i to'na taparahiraa hia, e te Peropheta ra o Iosepha Semita i te pae anavai ra o Mississipi.

Ua parau oia: "Te tohu nei au e, e rahi atu â te hamani ino raa te fariiha e te Feia Mo'a, e rave rahi te taparahi-

hia e te feia hamani ino, e pohe atoa vetahi no to ratou mau ati e te ma'i, area ra e ora te vetahi no te haere e patu i te mau oire rarahi e te oire rii, e e ite ratou i te feia mo'a ia riro ei feia puai i rotopu i te mau mou'a ofai."

Te mauruuru nei matou i riro ratou ei nunaa puai, mai te fenua Canada i te pae apatoerau, e tae noa'tu i te fenua Mexico i te pae apatoa. Te vai nei 112 tītī no Ziona e ua vai noa to Oe varua e ta Oe haamaitairaa i nia i te mau tane e te mau vahine tei faataahia no te peretiteni i roto i taua mau tītī ra e tei parauhia ia peretiteni i nia i te mau pūpū no te Autahu'araa, i nia i te Pūpū Tuahine faaora, te mau Haapiiraa Sabati, te mau Haapiiraa na te mau tamarii e te mau Pūpū no te mau Taeae e te mau Tuahine apī.

Te oaoa nei matou no te faatiaraahia te hoê tītī no Ziona i nia i te fenua atea ra o Hawaii. I te mau vahi atoa ua riro to Oe mau taata ei nunaa rahi e te puai mai te faatia i te tohuraa i tohu hia e te Peropheta ra o Iosepha Semita i te pae anavai ra o te Mississippi.

Te mauruuru papu nei matou ia Oe, e to matou Metua here i te ao ra, no te hamani maitai o te mau taata no teie tufaa fenua, e te oaoa nei matou no te mo'e ê raa o te mana'o patoi. Te mauruuru nei matou no te tauiraa o te roo o to oe mau taata e i teie nei, mai New York i San Francisco, e mai te Canada e tae noa'tu i Mexico, ua riro ei faufaa rahi ia itehia e e Feia Mo'a tei ora ma te haapao i te Evanelia.

No te rahi o te roo o te Faaora ua faasataurohiaolia, e ia fatata te 2000 maitahiti tei pau, mai to'na poheraa, i reira te taata i ite ai e, ua au roa To'na mau haapiiraa no te varua ora, eiaha i teie ana'e oraraa, ia haapaohia ra e horoa mai te reira te hanahana no te ora e tae mai nei.

Te oaoa nei matou i te mea e, e ore roa e tia i te hoê ia

faahapa i te mau haapiiraa a te Feia Mo'a, no te mea ua ta-
no maitai to matou faaroo e te mau haapiiraa a te Bibilia.

Te mauruuru nei matou, e te Metua, no te reira mau mea
e te pure haehaa'tu nei matou ia Oe, eiaha to matou mau ma-
na'o ia haapourihia, eiaha atoa matou e haere ê i te parau
mau, eiaha atoa hoi matou ia ofati i te hoê fafau ta matou i
faaau ia Oe; area ia rahi noa'tu to matou matahiti e to ma-
tou haroaroa, ia rahi atoa to matou maramarama, to matou
ite e ta matou faaiteraa no te mo'araa o te Evanelia o Iesu
Mesia ta matou i farii.

Ia vai faaroo noa matou i te mau faaueraa o te Parau
mo'a. Ia haamana'o noa matou i te mau haapiiraa a te Faa-
ora a parahi ai oia i rotopu i te Ati Nephi, i nia i te fenua
nei i muri a'e i To'na tia faahouraa, e Ta'na mau haapiiraa
i Ta'na mau pipi e te mau Aposetolo i nia i te tahi fenua.
Te pure haehaa'tu nei matou, e te Metua, ia vai noa to Oe
varua i rotopu ia matou nei.

Ua hau roa matou i te mauruuru no te faaho'iraahia mai
te Autahu'araa i nia i te fenua nei, te mana ia rave i te ohi-
pa na roto i te i'oa o To Tamaiti fanau tahi, tei horoahia mai
ia matou no una ia Oe na, e na roto i te mana o taua Auta-
hu'araa ra, e te Metua, e na roto i te i'oa o te Taraehara,
te haamo'a nei matou no Oe, i teie nei taime, teie nei mene-
ma tei faatiahia i nia i teie aivi mo'a.

Te haamo'a nei matou i teie aivi iho e te fenua tei faa-
ti mai e te mau mea atoa tei ravehia no te faatiaraa i teie nei
menema; e te pure haehaa'tu nei matou ia Oe ia paruruhia
te reira i te mau mea atoa ra e ia vai noa ia ei iteraa no te
Atua, o Iesu Mesia, e no te ohiparaa a Iesu Mesia i rotopu

i te mau taata tei parahi i nia i teie nei fenua i te mau tau tahito ra.

Te rave nei matou i teie nei mau mea na roto i te hae-haa, te haamaitai e te mau ruuru ia Oe na roto i te mana o te Autahu'araa a te Atua e na roto i te i'oa o Iesu Mesia.

Amene.

TE MAU PARAU API

Ua maitihia.

I te ava'e no Novema i mairi a'enei, ua maitihia te taata ra o Dr. Franklin L. WEST, no Roto Miti, ei taata tauturu faatere no te Pūpū Boy Scouts no America. E melo taua taata no te pūpū faatere haapiiraa no te Ekalesia e o oia te hoê melo no te Peretifeniraa faatere no te Feia Apî.

Te faaitehia nei e e ere o oia ana'e tei hanahana no to'na maitiraahia, ua hanahana atoa te faatereraa e te mau Feia Apî no te Ekalesia tei tauturu puai i te faatupuraa i te Boy Scouts i rotopu i te mau fenua mou'a.

E Tamarii maere mau.

I te 5 no Novema i mairi a'enei ua fanau te vahine ra o Mildred ARMSTRONG i te hoê tamahine iti, e i te mahana i muri iho ua afaihia taua aiu ra i te taote niho. No te aha? No te iritiraa i to'na mau niho, no te mea ua fanauhia teie nei aiu ma to'na mau niho atoa, e no to ratou tupuraa pio ua iritihia ratou maori ra e piti. Te parau nei te mau taote no Tarafonia a tahi ra ratou i ite ai i te hoê tamarii tei fanauhia ma to'na mau niho atoa e ua maere roa ratou i te iteraa'tu i taua aiu ra.

Na te mai tihe i faaora.

I roto i te hoê raveraa ohipa na te hau Amerika i Pocatello, te rave ra te taata ra o William Brown, e i te tahi mahana, a mai tihe ai oia, ua matara te tuatiraa o ta'na ivi tapano e ua afaihia oia i te taote. E piti maha-

na to te taote tamataraa i te faaho'i i taua ivi ra i to'na vairaa e aita oia i manuia e ua rahi roa te oruraa o te tua o taua taata ra. Afaihia'tura oia ia hi'ohia i roto i te hi'o faarahi e i reira itehia'tura e mauini roa oia ia faaho'ihia taua ivi ra maori ia faataotobia, no reira afaihia'tura i te iri tapuraa e i reira a haamata'i oia i te hau'a i te raau faataoto mai tihe puai ihora oia e i taua taime ihora ho'i atura te ivi i to'na vairaa mau e ora roa a'era taua taata ra.

Ua po i te avatea.

I te 14 no Novema i mairi a'eui ua pouri roa te oire ra o Chicago i te hora 12 i te avatea e ua tutuihia te mau mori atoa ia maramarama te mau aroa. Ua faaitohia e, no te matai ore i taua mau mahana ra, ua haaputu noa te au auahi, no roto mai i te mau haapupuraa, i raro a'e i te mau ata e na te reira i haapouri i te mahana.

E hopu te puaa i te pape.

E' puaa iho a te puaa, area ra ta'u ra e ere ia i te puaa' : o te parau ia a te taata faaapu ra o Julian BROWN no Kingston, Amerika. No reira ua hamani oia i te hoê hopuraa pape na ratou e te faabopu nei oia ia ratou i te mau mahana atoa.

Ua opanihia te faatairaa pû.

I te tomoraahia te hoê e'a turu rahi tei hamanihia i nia i te anavai ra o Mississippi, ua opanihia te mau pûpû pû ia haere e faatai i te pû na nia i taua e'a turu ra. Ua mata'u te mau taata faatere o te parari taua e'a ra, eiaha no te ta'i o te pû, no te mau taata te haere na muri ia ratou o te ta-hoê ratou i ta ratou tuuraa avae, mai te faehau, e na te reira e hamani ino i taua e'a turu ra, no reira ua faauehia ratou ia faatai noa i ta ratou mau pehe i na hiti o te anavai.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.